

Kommuneqarfik Sermersuumi Najukkani Ataatsimiititalianut ileqqoreqqusat

Kommunit aqunneqarnerat pillugu Inatsisartut inatsisaat nr. 29, 17. november 2017-imeersumi § 32 kiisalu 28. aggusti 2018-imi Kommunalbestyrelsip aalajangernera naapertorlugu:

Kapitali 1

Siunertaq

§ 1. Najukkani ataatsimiititaliat sulianik, najukkami najugaqartut, peqatigiiffiit, kommunimi politikerit oqartussaasullu suleqatigiinnerisigut najukkani innuttaasut taakkulu atugassatigut, kulturikkut oqartussaaqatigiinnermilu periarfissaasa naleqartitaasalu ataannarnissaat ineriartorteqqinnissaallu anguniarlugu ingerlanneqartunik siuarsaanermikkut najukkani oqartussaaqatigiinnermik nukittorsaassapput.

Suliassat

§ 2. Najukkami ataatsimiititaliaq peqquneqartilluni Kommunalbestyrelsimut, Aningaasaqarnermut Inuussutissarsiornermullu Ataatsimiititamut ataatsimiititanullu ataavartunut oqaaseqarnissaminut pisussaaffeqarpoq. Najukkanili Ataatsimiititaliat akissuteqarnermikkut nalunaarutigisinnaavaat, pineqartumut oqaaseqaatissaqaratik. Najukkami Ataatsimiititaliaq sumiiffimmi innuttaasunut immikkut ittumik sunniuteqarsinnaasunut tusarniaasoqarnerani akissuteqartassaaq, assersuutigalugu makku eqqarsaatigalugit: timalimmik pilersaarutitut, avatangiisinut, peqqissutsimut, angallannermut, timersornermut, atuarfeqarnermut, meeqqanut, inuusuttunut, utoqqarnut, kulturikkut sunngiffimmilu sammisassaqartitsinernut tunngasut. Sullinneqarfiup iluaneersunit aamma avataaneersunit tusarniaassutit immikkoortinneqassapput. Kommunimit tusarniaasoqartillugu (sullinneqarfiup iluani) tusarniaanissamut pisussaaffeqartoqarpoq, sullinneqarfiullu avataani tusarniaasoqartillugu paasissutissiinissamut pisussaaffeqartoqarluni. Paasissutissiinissamut pisussaaffeqarneq isumaqartinneqarpoq, kommunimit tusarniaassummut akissuteqaat najukkami ataatsimiititaliamut ilisimatitsissutigineqassasoq/assilinera ingerlateqqinneqassasoq.

Imm. 2. Ataatsimiititanut ataavartunut, kiisalu Aningaasaqarnermut Inuussutissarsiornermullu Ataatsimiititaliamut oqaluuserisassanut ilanngunneqartussanik najukkamut attuumassuteqartut eqqarsaatigalugit najukkami ataatsimiititaliaq siunnersuuteqarsinnaavoq.

Imm. 3. Ukiumoortumik aningaasaliissutit atortarnissaannut Najukkami Ataatsimiititaliaq kommunalbestyrelsimut akisussaaffilerneqarpoq.

Imm. 4. Najukkami Ataatsimiititaliamut aningaasaliissutinit sumiiffimmi najugaqartut, peqatigiiffiit, kommunimi politikerit aammalu oqartussat akornanni suleqatigiinnerat, kiisalu sumiiffinni innuttaasut taakkulu timalimmik, kulturikkut oqartussaaqataanerisalu

periarfissaasa naleqartitaasalu attannissaat inerisaqqinnissaallu siuarsarneqassapput. Aningaasaliissutit akisussaaffigineri kommunimit piginnaatitsissummut kiisalu inatsisit allat atuuttut naapertorlugit isumagineqassapput. Kommunip piginnaatitsissutaa tassaavoq, sumiiffimmi innuttaasut nalinginnaasumik pisariaqartitaannik naammassinninnissaq anguniarlugu, aningaasat kommunimit qanoq atorneqarnissaannut kommunimut tunngavissarineqartut.

Imm. 5. Aningaasaliissutit najukkami ataatsimiititaliamit akisussaaffigineqarneri pillugit immikkut nassuiaat. Aningaasaliissutit nammineq atugassat isummerfiginissaannut suliani najukkami ataatsimiititaliat aalajangiisinnaataapput. Apriilip qaammataa naatinnagu ukiup tullianut missingersuutissatut siunnersuut najukkami ataatsimiititaliamit nassiunneqassaaq. Immikkut aaqqissuunera siunertaanut pitsaassusaanullu Qinikkanut Allatseqarfimmit qulakkeerneqaaqassaaq, taavalu Aningaasaqarnermut Inuussutissarsiornermullu Ataatsimiititamit akuersissutigineqaaqartussaalluni. Najukkami ataatsimiititaliaq qaammatit tamaasa qaammatip naannginnerani aningaasaliissutit qanoq atorneqarsimanersut uppersarniarlugit akiligassat, aningaaserivik karsilu pillugit allagaatit tamaasa Najukkami Ataatsimiititalianut ataqatigiissaarisumut nassiussisassaaq.

Aningaasanik agguaassisarnermi makkua eqqarsaatigineqassapput:

- Aaqqissuussat, sumiiffinni najugaqartunut ataatsimoornerulersitsisut inooriaatsimillu ilorraap tungaanut saatitsisinnaasut.
- Aaqqissuussat, Najukkami najugaqartunut ataatsimoornerulersitsisut inooriaatsimillu ilorraap tungaanut saatitsisinnaasut
- Aaqqissuussat, illoqarfigisami innuttaasut akornanni, atuisut akornanni, suliffeqarfiit akornanni, ataatsimoortukkaani assersuutigalugu utoqqaat, meeqqat, angajoqqaat imaluunniit ataatsimoorfiusartut arlaatigut anguniagaqarlutik pitsaanerulersitsinissaq anguniarlugu sulissuteqartartut
- Aaqqissuussat neqeroorutillu kulturikkut, nipilersornikkut, timersornikkut eqqumiitsuliornikkut sunngiffimmilu sammisassaqtitsinikkut siunertarineqartut pitsaanerulersinnissaannut ineriartortinneqarnissaanullu tunngassuteqartut
- Agguaanneqartussatut aningaasaliissutit aamma tusarniaassutinut tamanut ammasumik ingerlatitassanut, workshops-inut, suliniutinut, aaqqissukkanut allanut sulianulluunniit Najukkami Ataatsimiititaliap pilersitaanut atorneqarsinnaapput.

Imm. 6. Najukkami ataatsimiititaliaq ukiup naajartornerani novembarip qaammataani amerlanerpaamik 40.000 koruuninik aningaasaliissutinik nammineq atorsinnaasanik atunngitsuugaqarsimappat, siunertaa borgmesterip allatseqarfianit akuersissutigineqarpat, Aningaasaqarnermut Inuussutissarsiornermullu Ataatsimiititaq akuersiteqqaarnagu najukkami ataatsimiititaliami isumaqatigiittoqartillugu aningaasaliissutit atugassanngortissinnaavai.

Imm. 7. Immikkoortitat imigassallerfiusunut atorneqassanngillat.

Imm. 8. Aningaasat atorneqanngitsut ukiup tullianut aningaasaliissutinut nuunneqarsinnaanngillat.

Imm. 9. Sumiiffiit inerisarnissaannut sammisaqartitsinerni, suleqatigiissitsinerni, innuttaasunik ataatsimiisitsinerni allatigullu eqqartuinerni najukkami ataatsimiititaliamit innuttaasunik annertuumik peqataatitsisoqartassaaq.

Imm. 10. Kommuneqarfik Sermersuumi najukkami ataatsimiititaliat allatseqarnerat Qinikkanut Allatseqarfimmit isumagineqassaaq.

Najukkami ataatsimiititaliap sumiiffimmi suliassaqarfii

§ 3. Tasiilami, Paamiuni, Ittoqqortoormiini aamma Nuummi najukkami ataatsimiititaliaqarpoq. Najukkani ataatsimiititaliat tamarmik immikkut illoqarfimmi killeqarfii tikillugit, tassa Tasiilami, Paamiuni, Ittoqqortoormiini aamma Nuummi akisussaaffigineqarput.

Kapitali 2

Qinersineq

§ 4. Innuttaasunik ataatsimiisitsinermi najukkami ataatsimiititaliamut qinersineq pissaaq, qinersisoqarnissaalu ullut 14-it sioqqullugit nalunaarutigineqassalluni. Qinigassanngortittut tamarmik naligiissillugit tulleriiaarneqassapput. Allassimasuliortoqarsinnaanngilaq.

Imm. 2. Inersimasut 16-ileereersimasut illoqarfimmi najugaqavissut kikkulluunniit najukkami ataatsimiititaliamut qineqqusaarsinnaapput, taamaattorli qineqqusaartoq 18-it inorlugit ukioqarpat angajoqqaatut oqartussaassuseqartut akuersiteqqaarneqassapput.

Imm. 3. Qinersinermi innuttaasunik ataatsimiisitsilluni pisumi kikkut tamarmik 16-ileereersimasut illoqarfimmi najugaqavissut qinersisinnaatitaapput. Qineqqusaartut akornanni qinersinissamut takkuttut innuttaasunit qinerneqassapput. Innuttaasut tamarmik immikkut qinigassanngortittut marluk qinernissaannut marloriarlutik qinersitinneqassapput. Taasineq isertortumik ingerlanneqassaaq, allakkatigut taasisoqassalluni.

Imm. 4. Najukkami ataatsimiititaliamut qinigassanngortinniarluni nalunaarneq pissaaq, qinersineq ullunik tallimanik sioqqullugu sumiiffimmi kommunip allaffianut nalunaaruteqarnikkut.

Imm. 5. Qinigassanngortitsinermi pisinnaatitsineq inerteqqutaanngilaq.

Imm. 6. Paamiuni, Tasiilami Ittoqqortoormiinilu qinigassanngortittut akornanni tallimat inorlugit sassartoqassappat qinersineq pissanngilaq, taamaalilluni illoqarfimmi pineqartumi najukkami ataatsimiititaliamik pilersitsisoqassanngilaq. Paamiuni, Tasiilami Ittoqqortoormiinilu qinigassanngortittut tallimaannaat sassassappata, Kommunalbestyrelsimut ingerlaannartumik innersuunneqassapput.

Imm. 7. Paamiuni, Tasiilami Ittoqqortoormiinilu qinigassanngortittut akornanni taaneqarneri naligiippata, Kommunalbestyrelsimut innersuunneqassapput. Naligiimmik qinerneqartuni allani naligiittut qinerneqartut akornanni makitsineq pissaaq.

Imm. 8. Paamiuni, Tasiilami Ittoqqortoormiinilu qinigassanngortittut tallimat qinerneqarnerpaasut, najukkami ataatsimiititaliamut ilaasortassatut Kommunalbestyrelsimut

innersuunneqassapput. Najukkami Ataatsimiititaliamut qinerneqanngitsoortut sinniisussanngortussanngorlugit kommunalbestyrelsimut innersuunneqassapput.

Imm. 9. Nuummi qinigassanngortittut akornanni qulit inorlugit sassartoqassappat, qinersineq pissanngilaq, taamaalilluni illoqarfimmi pineqartumi najukkami ataatsimiititaliamik pilersitsisoqassanngilaq. Nuummi qinigassanngortittut quliinnaappata, ingerlaannaq akuersissutigisassanngorlugit Kommunalbestyrelsimut innersuunneqassapput.

Imm. 10. Najukkami ataatsimiititaliamut ilaasortatut qinigassanngortittussat Kommunalbestyrelsimut inassutigineqartussat qulit, taasinerit amerlassusaat malillugit qinerneqassapput taavalu illoqarfiup immikkoortuini suminggaanneerfii naapertorlugit, tassa Nuussuarmiit, Qinngutsinniit Nuullu qeqqaniit aallartitaassallutik. Illoqarfiup immikkoortuineersut immikkut marluk qinerneqarnerpaat, najukkami ataatsimiititaliamut ilaasortat arfiniliusut qinerneqaaqqaassapput. Ilaasortanngortussat sisamat qinigassanngortittut sinnerisa akornanni qinerneqarnerpaajusut toqqarneqassapput. Illoqarfiup immikkoortuinit tamanit immikkut marluk iluatsinngippata, qinigassanngortittut akornanni taaneqarnerpaat toqqarneqassapput.

Imm. 11 Illoqarfiup immikkoortuani ataatsimi qinigassanngortittut marluk naligiimmik qinerneqarsimappata, makitsisoqassaaq. Qinigassanngortittut sinnerisa akornanni naligiimmik qinerneqarsimatillutik, qinigassanngortittut naligiimmik qinerneqartut akornanni makitsisoqassaaq.

Imm. 12. Innersuunneqartut Kommunalbestyrelsimut akuersissutigineqarneri tunngavigalugit najukkami ataatsimiititaliaq inissitsitissaaq. Taamaaliortoqassaarlu innersuussat Kommunalbestyrelsimut akuersissutigineqareernerini kingusinnerpaamik ullut 21t qaangiutsinnagit.

Imm. 13. Qinersineq ukiut pingasukkaarlugit ingerlanneqartassaaq.

Najukkami ataatsimiititaliap katitigaanera il. il..

§ 5. Paamiuni, Tasiilami Ittoqqortoormiinilu najukkami ataatsimiititaliat tallimanik ilaasorta qarput aammalu Nuummi qulinik ilaasorta qarlutik. Innersuussinerup kingorna najukkani ataatsimiititaliani ataasiakkaani ilaasortaasussat Kommunalbestyrelsimut toqqarneqassapput.

Imm. 2. Ittoqqortoormiini Najukkami Ataatsimiititaliamut ilaasortat pingasuupput.

Imm. 3. Sinnisut allassimaffiat Qinikkanut Allatseqarfimmit suliarineqassaaq. Allattorsimaffinni allanneqassapput qinigassanngortitat qinigaanngitsut, kisianni pisinnaanngitsoqalerneratigut taartaasussatut najukkami ataatsimiititaliamut ilaasortanngorsinnaatitaasut. Sinniisussanik allattorsimaffik najukkani ataatsimiititalianut ataasiakkaanut suliarineqassaaq, taamaalillutik qinigassanngortittut qinigaanngitsulli taagorneqarnertik malillugu tulleriinnilersorneqassallutik.

Imm. 4. Qinigassanngortittut arlallit sinnisutut allattorsimaffimmiittut akornanni naligiimmik qinerneqarsimappata, tulleriarneri makitsinikkut aalajangerneqassapput, najukkamilu borgmesterip allatseqarfiani aqutsisoq makitsisuussaaq.

Imm. 5. Najukkani ataatsimiititalianut ilaasortat inatsisartunut imaluunniit kommunalbestyrelsimut ilaasortaassanngillat.

Imm. 6. Najukkami ataatsimiititaliamut ilaasortat sumiiffimminnit allamut nuuttut ataatsimiititaliamit tunuassapput. Aammattaaq najukkani ataatsimiititalianut ilaasortat Kommunalbestyrelsimut imaluunniit Inatsisartunut qinigaasut taamatut.

Imm. 7. Najukkani ataatsimiititalianut ilaasortat namminneq kissaatertik malillugu qaqugukkulluunniit ataatsimiititaliamit tunuarsinnaapput. Taama pisoqartillugu sinniisoq siulleq ataatsimiititaliamut ivertinneqartassaaq.

Imm. 8. Najukkami ataatsimiititaliat Paamiuni, Tasiilami aamma Ittoqqortoormiini ikinnerpaamik pingasunik ilaasortaqlutik taavalu Nuummi arfineq-marlunnik ilaasortaqlutik sulinertik ingerlassinnaavaat.

Siulittaasumik siulittaasullu tullianik qinersineq.

§ 6. Ataatsimiititaliap ataatsimeerngaarnissaanut ilaasortaangajulleq (utoqqaanerpaaq) aggersaassaaq.

Imm. 2. Ilaasortat akornannit Najukkami Ataatsimiititaliap siulittaasussaa ataatsimeerngaarnermi amerlanerpaamik taaneqartoq siulittaasunngussaaq. Ataatsimiinneq ilaasortamit angajullerpaamit (utoqqaanerpaaq) aqunneqassaaq. Siulittaasumik qinersineq pereerpat, najukkami ataatsimiititaliaq siulittaasup tullianik qinersissaaq, taannalu siulittaasumut taartaasassaaq.

Imm. 3. Siulittaasutut siulittaasullu tulliatut qinerneqartoq naaggaarsinnaatitaavoq.

Imm. 4. Siulittaasooq imaluunniit siulittaasup tullia najukkami ataatsimiititaliamit tunuarpat, najukkami ataatsimiititaliap piffissap sinnerani atuunnissaa pillugu nutaamik qinersisoqassaaq.

Kapitali 3

Ataatsimiittarnerit

§ 7. Ileqqusumik ataatsimiinnerit qaqugu sumilu ingerlanneqassanersut najukkami ataatsimiititaliap aalajangertassavaa. Piffissaq sumiiffillu kingusinnerpaamik ullut 14it sioqqullugit tamanut nalunaarutigineqartassapput. Ileqqusumik ataatsimiinneq nalinginnaasumik qaammammut ataasiarluni pisassaaq. Inissitsiterluni ataatsimiinnermi ukiumut ataatsimiiffissat najukkami ataatsimiititaliamit akuersissutigineqassapput. Taamatut iliortoqaqqissaaq ukioq ataaseq qaangiukkaangat.

Imm. 2. Najukkami ataatsimiititaliap ataatsimiinnissai siulittaasumit piareersarneqartassapput ilaasortanillu ataatsimiigiaqqusisartuussalluni. Najukkami ataatsimiititaliami isumaqatigiinniarnertit taasinerillu siulittaasumit aqunneqassapput taassumalu aalajangernerit eqqortumik ingerlanneqarnissaat isumagissallugit.

Imm. 3. Suliat isumagineqartarneri siulittaasumit nakkutigineqassapput.

Imm. 4. Immikkut ittumik ataatsimiittoqartassaaq taamaaliortoqarnissaa siulittaasup pisariaqartippagu, imaluunniit ilaasortat ikinnerpaamik pingajorarterutaasa tamanna piumasaaqatigippasuk. Immikkut ittumik ataatsimiinnerit qaqugu sumilu pissasut siulittaasumit aalajangerneqartassapput, tamakkulu sapinngisamik tamanut nalunaarutigineqartassapput.

Imm. 5. Oqaluuserisassat aammalu atortussat suliani oqaluuserisassanngortinneqartuni nalilerneqartussat pisariaqartut ataatsimiinnissap ulluinnarnik sisamanik sioqqullugu ilaasortanut nassiunneqarnissaat siulittaasumit isumagineqassapput. Suliaq kinguartinneqarsinnaanngippat. oqaluuserisassat atortussallu pisariaqartut piffissaasoq eqquutsinnagu nassiunneqarsimagaluartut, najukkami ataatsimiititaliaq aalajangiisinaavoq. Oqaluuserisassat imaluunniit atortussat pisariaqartut piffissaasoq eqquutsinnagu nassiunneqarsimaneri oqaluuserisassanut allanneqarnissaa siulittaasumit isumagineqassaaq. Suliap nassiunneqarsinnaannginneranut/kinguartinneqarsinnaannginneranut tunngavilersuutit oqaluuserisassamittaaq allanneqassapput.

Imm. 6. Najukkami ataatsimiititaliamut ilaasortat kikkulluunniit siulittaasumut saaffiginninnermikkut oqaluuserisassanngortitsisinaapput.

Imm. 7. Suliat imarisaat najukkami ataatsimiititaliap ataatsimiinnerani oqaluuserineqartussat, kiisalu aalajangiisinaanermut najoqqutassiaq, nipangiussisussaatitaaneq pillugu inatsisitigut malittarisassaq malillugu sapinngisamik tamanut saqqummiussinnaasat saqqummiunneqartassapput, assersuutigalugu kommunip allaffiatigoorlugu.

§ 8. Najukkami ataatsimiititaliaq tamanut ammasumik ataatsimiittassaaq.

Imm. 2. Suliap qanoq ittuussusaa pissutigalugu suliaq ataatsimiinnermi matoqqasumi pisariaqarsorineqarpat najukkami ataatsimiititaliamit oqaluuserineqarsinnaavoq. Suliassap matoqqasumik ataatsimiissutigisariaqarneranik apeqqut matoqqasumik ataatsimiinnermi isumaqatiginninniutaassaaq, taamaaliornissaaq najukkami ataatsimiititaliamit imaluunniit siulittaasumit aalajangerneqarpat.

Imm. 3. Najukkami ataatsimiititaliap suliassat matoqqasumik oqaluuserineqarneranni inunnik kommunimi atorfeqartunik najuuttoqarsinnaanera akuerisinaavaa. Taamaattorli Borgmesterip Allatseqarfianit sulisumik peqataatitsisoqartuaannarsinnaavoq, aamma suliat ataatsimiinnermi matoqqasuni oqaluuserineqarnerisa nalaanni. Suliassap matoqqasumik oqaluuserineqarnerani inuit allat najukkami ataatsimiititaliap aggeqqusinnaavai suliassap nassuiarneqarnissaa pissutigalugu tamanna kissaatiginarpat.

Aalajangiisinaassuseqarneq

§ 9. Paamiuni, Tasiilami aamma Ittoqqortoormiini najukkami ataatsimiititalianut ilaasortat ikinnerpaamik pingasut najuutsillugit aalajangiisinaatitaapput. Nuummi najukkami ataatsimiititaliamut ilaasortat ikinnerpaamik arfineq-marluk najuutsillugit aalajangiisinaatitaapput. Taasinerni naligiittoqassagaluarpat, siulittaasup taasinera aalajangiisuussaaq.

Imm. 2. Aalajangernerni amerlanerussuteqarneq atorpeqassaaq.

Aalajangiinermi najoqqutassiaq

§ 10. Najukkami ataatsimiititaliap aalajangerneru aalajangiinernut allattaavimmut allatorneqartassapput, ataatsimeereernerillu kingorna tamatigut ilaasortat ataatsimeeqataasut atsiortassallutik.

Imm. 2. Ilaasortap kialuunniit piumasarisinnaavaa isummani allaasoq imaqarniliamut naatsumik allanneqaqqullugu, sulianilu pisortatut oqartussaasumut allamut ingerlateqqitassani piumasarisinnaallugu taassuma aamma imaqarniliap imaanik ilisimatinneqarnissaa. Ilaasortap taassuma suliap nassiunneqarnerani suliaq ilaqartissinnaavaa nammineq isummaminut tunngavilersuutigisaminik.

Imm. 3. Ataatsimiititaliap tamatigut ataatsimiinneranit imaqarniliaq, siulittaasoq suleqatigalugu, allattoqarfimmit suliarineqartassaaq. Imaqarniliaq ataatsimiititaliap ataatsimiinnerata kingorna kingusinnerpaamik ullut tallimat qaangiuppata ilaasortanut tunniunneqareersimassaaq.

Ilaasortat suliniuteqarsinnaatitaanerit

§ 11. Najukkami ataatsimiititaliamut ilaasortap kialuunniit kommunip susassaarfii pillugit apeqqutit suulluunniit najukkami ataatsimiititaliamut saqqummiussinnaavai, aammalu tamakku pillugit aalajangiinissanut siunnersuutinik saqqummiussinnaalluni.

Kapitali 4

Ilaasortat suliasanik takunnissinnaatitaanerit

§ 12. Ataatsimiititaliap suliatut tigummisai kommunip allaffeqarfiani inarneqarsimasutut saqqummiunneqartut pillugit, najukkami ataatsimiititaliamut ilaasortat kikkulluunniit sulinerminnut atatillugu suliatut atortussat misissuataarsinnaatitaavaat.

Imm. 2. naapertorlugu suliamik takunnissinnaatitaanermut qinnuteqaat najukkami ataatsimiititaliami siulittaasumut qinnutigineqassaaq.

Imm. 3. Suliap suliarineqarnera eqqarsaatigalugu, imaluunniit suliamik takunnissinnaatitaaneq pissusissamisuumngitsumik ajornartoortitsissappat suliamik takunnissinnaatitaaneq pisariaqarsorineqarpat borgmesterimit killilerneqarsinnaavoq.

Imm. 4. Najukkami ataatsimiititaliamut ilaasortaq kinaluunniit qinnuteqarnini naapertorlugu imm. 1-3-mi periarfissamik atuinermini suliamut aalajangersimasumut tunngasumi suliap assinganik nassinneqarsinnaavoq. Najukkamili ataatsimiititaliaq erseqqinnerusunik maleruagassiorsinnaavoq suliamut tunngasunik paasissutissanik nassinneqarsinnaanermut tunngatillugu, tamanna pisariaqartinneqarpat.

Kapitali 5

Suleqatigiissitat

§ 13. Suleqatigiissitaliat, sukumiisumik suleqatigiissitaliat, oqaloqatigiittarfiit aammalu ilinniartut suleqatigiit piareersarnermik siunnersuinerlimmillu piginnaasallit najukkami ataatsimiititaliamit pilersinneqarsinnaapput.

Kapitali 6

Suliami peqataasinnaanninneq.

§ 14 . Ilaasortat ilaat suliassami aalajangersimasumi inuttut ima soqutigisaqartiginersaq suliassaq taanna pillugu najukkami ataatsimiititaliap oqaluuserinninnerani taasineranilu peqataannitsoortariaqarnersaq najukkami ataatsimiititaliap aalajangiiffigissavaa.

Imm. 2. Ilaasortap ataatsimiititaliap ilisimatittassavaa suliani aalajangersimasuni attuumassuteqarnini pissutigalugu ataatsimeeqataanini nalorninartorsiutigineqalissappat. Ataatsimiititaliami ataatsimiinnissaq sioqqullugu ilaasortap siulittaasq tamanna pillugu nalunaaruteqassaaq.

Imm. 3. Suliamut najukkami ataatsimiititaliap ataatsimiinnerani oqaluuserineqartussamut tunngatillugu ilaasortaq attuumassuteqarpallaartussaasq naatsorsuutigineqarpat, suliap oqaluuserineqarnissaanut sinniisq siulleq siulittaasumit ataatsimiigiaqquneqassaaq.

Kapitali 7

Sinniisunik aggersaaneq

§ 15. Ilaasortap ataatsimiigiaqqusissutip tighunerani peqqissutsimik, naartunermik, erninermi sulinnigiffeqarnermik imaluunniit meeravissartaarnermik, allatigut pisortani inuussutissarsuteqarnermik, niuerneramik assigisaanilluunniit peqquteqartumik ataatsimiinnissami ataatsimiititaliap tulluuttuniluunniit arlalinni najukkami ataatsimiititaliami ataatsimeeqataasinnaanninnini siulittaasumut nalunaarutigissavaa. Tamatuma kingorna ataatsimiinnissamut sinniisq siulleq aggersarneqassaaq.

Imm. 2. Ilaasortaq ataatsimiititaliami sulini nangeqqissinnaannorpagu, sinniisq najukkami ataatsimiititaliamit tunuassaaq.

Imm. 3. Sinniisup ivertinneqarnerani piumasaqaatit qanoq issanersut najukkami ataatsimiititaliamit aalajangiiffigineqassaaq.

Kapitali 8

Najukkami ataatsimiititaliap Kommunalbestyrelsimut ilisimatitsissuteqartussaataaana

§ 16. Najukkami ataatsimiititaliap sumiiffimmi suliai pillugit pissutsinik paasissutissiinnissamut kommunalbestyrelse najukkami ataatsimiititaliamit aqutissiuunneqarlunilu nalunaarfigineqassaaq.

Imm. 2. Najukkami ataatsimiititaliaq kommunalbestyrelsillu aallartitai ikinnerpaamik ukiumut ataasiarlutik oqaloqatigiinnikkut ataatsimeeqatigiittassapput.

Kapitali 9

Akissarsiat il. il.

§ 17. Najukkami ataatsimiititaliamut ilaasortatut sulinermi akissarsiat kommunalbestyrelsimit aalajangersarneqartassapput.

Imm. 2. Akissarsiat kommunalbestyrelsimit akigitatut aalajangiunneqartut naapertorlugit atuutsinneqartassapput. Maannakkut akigitat borgmesterip akissarsiaata 1/35 delii ileqqoreqqusap matuma atuutsinneqalernani atuutissaaq.

Imm. 3. Akissarsiaqartitsinermi najukkami ataatsimiititaliamut ilaasortanut taamaallaat atuutsinneqarpoq.

Nakkutilliineq

§ 18. Kommunalbestyrelse najukkami ataatsimiititaliat suleriaatsimi aamma malittarisassani matumani maleruaqqusat malinneraat nakkutiginnissaaq, aammalu pisortani malittarisassat atuuttut naapertorlugit ingerlatsisussaalluni.

Kapitali 10

Atuutilersitsineq allannguutillu

§ 19. Malittarisassat allangortinneqarneri Kommunalbestyrelsimit aalajangiiffigineqassapput, najukkami ataatsimiititaliamit inassuteqartoqareernerata kingorna aamma tamanna pisinnaavoq.

§ 20. Ileqqoreqqusaq ulloq 28. aggusti 2018-imi atuutilersinneqarpoq.

Nuuk, 4. septembari 2018

Asii Chemnitz Narup



Borgmesteri